

## ევროპის საბჭოს საპარლამენტო ასამბლეაში საქართველოს პარლამენტის მუდმივმოქმედი დელეგაციის 2022 წლის საქმიანობის ანგარიში

წინამდებარე ანგარიში ასახავს ევროპის საბჭოს საპარლამენტო ასამბლეაში (შემდგომში ასამბლეა) საქართველოს პარლამენტის მუდმივმოქმედი დელეგაციის (შემდგომში დელეგაცია) 2022 წლის განმავლობაში გაწეულ საქმიანობას, მათ შორის ასამბლეის პლენალური სხდომების მიმდინარეობას, საკომიტეტო მუშაობას, განხორციელებულ ვიზიტებსა და შეხვედრებს. ევროპის საბჭოს საპარლამენტო ასამბლეა 2022 წლის აპრილის ჩათვლით მუშაობდა ჰიბრიდულ რეჟიმში, ხოლო აპრილის სესიის შემდეგ ჰიბრიდული რეჟიმი სრულად გაუქმდა.

2022 წლის განმავლობაში ასამბლეის ფარგლებში განხორციელდა დელეგაციის წევრების 22 გასვლითი ვიზიტი.

2022 წელს, დელეგაციის შემადგენლობაში შედიოდნენ:

### ძირითადი შემადგენლობა:

1. ირაკლი ჩიქოვანი
2. ირაკლი კობახიძე
3. თამარ ტალიაშვილი \*
4. ხატია დეკანოიძე
5. ლევან იოსელიანი

### სათადარიგო შემადგენლობა:

1. არჩილ თალაკვაძე
2. გივი მიქანაძე
3. მარიამ ლაშხი
4. აკაკი მინაშვილი
5. ფრიდონ ინჯია

\*2022 წლის ოქტომბერში დელეგაციის შემადგენლობა დატოვა თამარ ტალიაშვილმა. საანგარიშო პერიოდში მისი ჩანაცვლება არ მომხდარა სხვა დეპუტატით.

### წლის განმავლობაში, საქართველოს დელეგაციისთვის მნიშვნელოვანი აქტივობები:

2022 წლის თებერვალში, რუსეთმა წამოიწყო აგრესიული ომი უკრაინის წინააღმდეგ. ამ განვითარებების ფონზე, ასამბლეამ მყისიერად დაამტკიცა მოსაზრება რუსეთის ევროპის საბჭოდან გარიცხვის შესახებ. შესაბამისად, ევროპის საბჭომ რუსეთი გარიცხა ორგანიზაციიდან. აქედან გამომდინარე ასამბლეის 2022 წლის დღის წესრიგში მნიშვნელოვანი ნაწილი დაეთმო რუსეთის ფედერაციის აგრესიას უკრაინის წინააღმდეგ. აღსანიშნავია, რომ საქართველოს დელეგაცია, სხვა ქვეყნებთან ერთად, მხარს უჭერდა რუსეთის ფედერაციის ქმედებების დამგმობ დოკუმენტებს.

2022 წლის საპარლამენტო ასამბლეის სესიის მეორე ნაწილზე, ასამბლეამ საქართველოსთვის მნიშვნელოვანი რეზოლუცია „საქართველოს მიერ ნაკისრი ვალდებულებების“ შესახებ დაამტკიცა. მონიტორინგის კომიტეტის მიერ შემუშავებული რეზოლუციის ტექსტი აღნიშნავს საქართველოში მიღწეულ უწვეტ და მნიშვნელოვან პროგრესს ევროპის საბჭოს ყველა პრიორიტეტული მიმართულებით.

აღსანიშნავია, რომ კულტურის კომიტეტის მედიისა და საინფორმაციო საზოგადოების ქვეკომიტეტის წევრებმა საქართველოს დელეგაციის, წევრი **თამარ ტალიაშვილი** აირჩიეს ქვეკომიტეტის თავჯდომარედ. ასევე, 2022 წლის რეკიავიკის მუდმივმოქმედ კომიტეტზე, განხილული იქნა და დამტკიცდა რეზოლუცია და რეკომენდაცია “კოვიდ 19-ის გავლენა ევროპის ციხეებში პატიმრებზე”, რომლის ანგარიში და პროექტი **გივი მიქანაძის** ავტორობით შემუშავდა.

2022 წლის განმავლობაში საქართველოს დელეგაციის წევრებმა, კომიტეტის შეხვედრებზე დასასწრებად განახორციელეს 18 გასვლითი ვიზიტი და ჯამში მონაწილეობა მიიღეს 34 კომიტეტის სხდომის მუშაობაში. საანგარიშო პერიოდში, არ განხორციელებულა ევროპის საბჭოს საპარლამენტო ასამბლეის წარმომადგენლების ვიზიტები საქართველოში.

## საპარლამენტო ასამბლეის სესიების მიმოხილვა

**საპარლამენტო ასამბლეის სესიის პირველი ნაწილი, ზამთრის სესია (24-28 იანვარი, სტრასბურგი, საფრანგეთი)**

სესიაზე მონაწილეობა მიიღეს ირაკლი ჩიქოვანმა (დელეგაციის ხელმძღვანელი) და ლევან იოსელიანმა.

პოლიტიკურ ჯგუფებს შორის არსებული ჯენტლმენური შეთანხმების თანახმად, ასამბლეის პრეზიდენტობის კანდიდატებს პოლიტიკური ჯგუფები როტაციის პრინციპით ასახელებენ. 2022 წელს, როტაციის პრინციპით, კანდიდატად დასახელდა გაერთიანებული ევროპელი მემარცხენეების (EUL) ხელმძღვანელი, **ტინი კოქსი**. აღსანიშნავია, რომ იანვრის სესიამდე პოლიტიკურ ჯგუფებს შორის არსებული ჯენტლმენური შეთანხმების საწინააღმდეგოდ კანდიდატურა წამოაყენა უკრაინის დელეგაციის ხელმძღვანელმა **მარია მეზენცევამ** (EPP/CD). ასამბლეის წევრებმა ევროპის საბჭოს საპარლამენტო ასამბლეის ახალ პრეზიდენტად გაერთიანებული ევროპელი მემარცხენეების (EUL) ხელმძღვანელი, **ტინი კოქსი** აირჩია.

ასევე დამტკიცდა ვიცე-პრეზიდენტების და ეროვნული დელეგაციების წევრთა სია.

საქართველოს დელეგაციის წევრებმა, სხვა ქვეყნის დეპუტატებთან ერთად, მხარი დაუჭირეს რუსეთის ფედერაციის დელეგაციის უფლებამოსილებების დამტკიცების წინააღმდეგ პროცედურის დაწყებას. საკითხი ანგარიშის მოსამზადებლად გადაეცა მონიტორინგის კომიტეტს და მოგვიანებით ასამბლეაზე ამ საკითხს კენჭი ეყარა. მხოლოდ ამის შემდეგ, რეზოლუციის საფუძველზე დამტკიცდა რუსეთის დელეგაციის შემადგენლობა.

აღსანიშნავია, რომ საქართველოს დელეგაციამ ასევე მხარი დაუჭირა რუსეთის ფედერაციის მიერ წარდგენილი ვიცე-პრეზიდენტობის კანდიდატის **პიოტრ ტოლსტოის** დამტკიცების წინააღმდეგ პროცედურის დაწყებას და კენჭის ყრის მოთხოვნას. კენჭის ყრის საფუძველზე, ასამბლეამ არ დაამტკიცა **პიოტრ ტოლსტოის** კანდიდატურა.

სხვა საკითხებთან ერთად, მნიშვნელოვანი განხილვები გაიმართა ისეთ თემებზე, როგორცაა ბიუროს პროგრესის ანგარიში, ლგბტ (LGBT) პირების უფლებები, იძულებითი გაუჩინარების და ალექსეი ნავალნის მოწამვლის საკითხები.

ასამბლეაზე ევროპის საბჭოს თავჯდომარების ფარგლებში, მინისტრთა კომიტეტის სახელით წარდგა იტალიის საგარეო საქმეთა მინისტრის მოადგილე, **დელა ვედოვა** და დეპუტატების შეკითხვებს უპასუხა ევროპის საბჭოს გენერალურმა მდივანმა **მარია პეჩინოვიჩ-ბურიჩმა**. ასევე, საკითხზე „ფეხბურთის მართვა და მისი ღირებულებები“ მოწვეული იყო და ისაუბრა ფიფას პრეზიდენტმა **ჯოვანი ინფანტინომ**.

დელეგაციისათვის განსაკუთრებულ მნიშვნელობას ატარებდა შემდეგი საკითხები:

- რუსეთის ფედერაციის დელეგაციის უფლებამოსილებების გასაჩივრების საკითხი;
- რუსეთის ფედერაციის დელეგაციის მიერ წარდგენილი ვიცე-პრეზიდენტობის კანდიდატის გასაჩივრების საკითხი;
- ანგარიში „სამხრეთ კავკასიაში LGBTI პირების უფლებების სავარაუდო დარღვევების“ შესახებ;
- მონიტორინგის კომიტეტის თავჯდომარის მაიკლ იენსენის ანგარიში, მონიტორინგის კომიტეტის 2021 წლის პროგრესის შესახებ;

დებატებზე „სამხრეთ კავკასიაში LGBTI პირების უფლებების სავარაუდო დარღვევების შესახებ“ ონლაინ ჩაერთო და სიტყვით გამოვიდა **თამარ ტალიაშვილი**. ასევე, კულტურის კომიტეტის მედიისა და საინფორმაციო საზოგადოების ქვეკომიტეტის შეხვედრაზე, ქვეკომიტეტის წევრებმა საქართველოს დელეგაციის, წევრი **თამარ ტალიაშვილი** აირჩიეს ქვეკომიტეტის თავჯდომარედ.

## **ევროპის საბჭოს საპარლამენტო ასამბლეის რიგგარეშე სესია (14-15 მარტი, სტრასბურგი, საფრანგეთი)**

რიგგარეშე სესიის მუშაობაში მონაწილეობა მიიღეს ირაკლი ჩიქოვანმა (დელეგაციის ხელმძღვანელი), თამარ ტალიაშვილმა და ხატია დეკანოიძემ.

უკრაინაში რუსეთის აგრესიის შედეგად და რუსეთის ფედერაციის მიერ ევროპის საბჭოს სტატუტის უხეში დარღვევის საპასუხოდ, 25 თებერვალს, ევროპის საბჭოს მინისტრთა კომიტეტმა რუსეთის ფედერაციას დროებით შეუჩერა წევრობა. განვითარებული მოვლენების შედეგად, მინისტრთა კომიტეტმა ევროპის საბჭოს საპარლამენტო ასამბლეას სთხოვა მოემზადებინა მოსაზრება რუსეთის ფედერაციის ორგანიზაციიდან გარიცხვის შესახებ, სტატუტის მერვე მუხლის საფუძველზე. 2022 წლის 14-15 მარტს, მუდმივმოქმედი კომიტეტის სანაცვლოდ, ჩაინიშნა ასამბლეის რიგგარეშე სხდომა.

რიგგარეშე სესიის ერთადერთი საკითხი იყო უკრაინაზე რუსეთის აგრესიის შედეგები. 14-15 მარტს გაიმართა პოლიტიკური ჯგუფების, პოლიტიკური კომიტეტის და თანასწორობის კომიტეტის შეხვედრები. მომხსენებელმა **ინგერდ შოუმ** წარადგინა ანგარიში - „უკრაინაზე რუსეთის აგრესიის შედეგები“. სესიის განმავლობაში სიტყვით გამოვიდა 160-მდე დეპუტატი, მათ შორის საქართველოს დელეგაციის ხელმძღვანელი **ირაკლი ჩიქოვანი** და დელეგაციის წევრები, **თამარ ტალიაშვილი** და **ხატია დეკანოიძე**. სამუშაო დღის ბოლოს ასამბლეამ დაამტკიცა შემუშავებული მოსაზრების ტექსტი და დაადასტურა მზადყოფნა რუსეთის ფედერაციის ევროპის საბჭოდან გარიცხვის შესახებ. საქართველოს დელეგაციის წევრებმა მხარი დაუჭირეს აღნიშნულ მოსაზრებას. მოსაზრების საფუძველზე რუსეთი გაირიცხა ევროპის საბჭოდან.

საქართველოს დელეგაციამ მონაწილეობა მიიღო მოსაზრების პირველადი ტექსტში ცვლილებების ასახვაში. პოლიტიკური კომიტეტმა, შეხვედრისას გაითვალისწინა შეხვედრაზე საქართველოს დელეგაციის ხელმძღვანელის **ირაკლი ჩიქოვანის** ცვლილება მოსაზრების მეხუთე აბზაცში, საქართველოზე რუსეთის აგრესიას და ოკუპაციასთან დაკავშირებით. ასევე, ამავე, აბზაცში დაემატა და დაფიქსირდა ფრაზა რუსეთის ფედერაციის მიერ დნესტრისპირეთის ოკუპაციაზე.

## **საპარლამენტო ასამბლეის სესიის მეორე ნაწილი, საგაზაფხულო სესია (25-28 აპრილი, სტრასბურგი, საფრანგეთი)**

სესიაზე მონაწილეობა მიიღეს ირაკლი ჩიქოვანმა (დელეგაციის ხელმძღვანელი), გივი მიქანაძემ, თამარ ტალიაშვილმა, ლევან იოსელიანმა და ხატია დეკანოიძემ.

საქართველოს დელეგაციამ მონაწილეობა მიიღო ევროპის საბჭოს საპარლამენტო ასამბლეის საგაზაფხულო სესიაზე და დაესწრო სესიის განმავლობაში მიმდინარე კომიტეტების და ქვე-კომიტეტების, ისევე როგორც პოლიტიკური ჯგუფების შეხვედრებს. აღნიშნული სესია კოვიდ-პანდემიის პერიოდის ბოლო სესია იყო, რომელიც ჰიბრიდულ რეჟიმში გაიმართა.

რუსეთის აგრესიული ომიდან გამომდინარე, მთავარი თემა იყო უკრაინის წინააღმდეგ ომი და მისგან გამოწვეული შედეგები. აღნიშნულ დებატებზე საქართველოს დელეგაციიდან სიტყვით დეპუტატები, **ხატია დეკანოიძე** და **გივი მიქანაძე** გამოვიდნენ. სპეციალური დებატები კი გაიმართა საერთაშორისო ჰუმანიტარული სამართლის დარღვევებზე პასუხისმგებლობის დაკისრების პრობლემების ირგვლივ. ასამბლეამ ასევე მოისმინა ანგარიშები შემდეგ საკითხებზე: ევროპის საბჭოსა და ევროკავშირის შორის სტრატეგიული პარტნიორობის გაძლიერება; ევროპაში რეალური დემოკრატიის დაცვა და ხელშეწყობა; დანაშაულის გზით შემქნილი ქონების

კონფისკაციის სასიკეთო მიზნებისთვის გამოყენება; შშმ პირთა დეინსტიტუციონალიზაცია; ძალოვნების მიერ გაუმართლებელი ძალის გამოყენების პრევენცია; სოციალურ ნიადაგზე დამყარებული დისკრიმინაციის წინააღმდეგ ბრძოლა; საქართველოს მიერ ნაკისრი ვალდებულებების შესრულება.

საქართველოსთვის მნიშვნელოვანი დებატები, რეზოლუციაზე - „საქართველოს მიერ ნაკისრი ვალდებულებების შესრულების“ შესახებ გაიმართა სასესიო კვირის ხუთშაბათს.

მონიტორინგის კომიტეტის მიერ შემუშავებული რეზოლუციის ტექსტი აღნიშნავს საქართველოში მიღწეულ უწყვეტ და მნიშვნელოვან პროგრესს ევროპის საბჭოს ყველა პრიორიტეტულ მიმართულებით.

კონკრეტულად, რეზოლუციის ტექსტი მიესალმება საქართველოს მთავრობასა და ასამბლეის მაღალი რანგის თანამშრომლობას და ბოლო წლებში განხორციელებულ საკონსტიტუციო რეფორმას, რომელიც საქართველოში აძლიერებს დემოკრატიულ პროცესებს და სასამართლოს თავისუფლებას; ასევე, რეზოლუცია მხარს უჭერს 2024 წლიდან საქართველოში სრულად პროპორციულ სისტემის ამოქმედებას და ხაზს უსვამს, საქართველოში ბოლო წლებში ჩატარებული არჩევნების ევროპულ სტანდარტებთან შესაბამისობას. ეს რეზოლუცია, ისევე როგორც შესაბამის საკითხებზე შემუშავებული სხვა რეზოლუციები, კიდევ ერთხელ მხარს უჭერს საქართველოს სუვერენიტეტს და ტერიტორიულ მთლიანობას და გმობს რუსეთის მიერ საქართველოს ოკუპაციას. ამავდროულად, რეზოლუციაში ასევეა საუბარი რეფორმების გაგრძელების მნიშვნელობაზე, რომელიც გულისხმობს სასამართლოს, რელიგიის საკითხებში სპეციალური სახელმწიფო სააგენტოს, საჯარო ინფორმაციის ეროვნული კომისიის და დემოკრატიულად ჩატარებული საარჩევნო პროცესების დემოკრატიულად აღქმის გაძლიერების მიმართულებით. მიღწეული შედეგების გათვალისწინებით და არსებული პროგრესის შესანარჩუნებლად, საქართველოს უახლოეს მომავალში აქვს „მკაფიო პერსპექტივა“ პოსტ-მონიტორინგის დიალოგის ეტაპზე გადასასვლელად.

საქართველოზე მონიტორინგის კომიტეტის მომხსენებლებმა, **ტიტუს კორლატანმა** და **კლოდ კერნმა** ასამბლეას წარუდგინეს ანგარიში და რეზოლუციის პროექტი საქართველოს მიერ ნაკისრი ვალდებულებების შესრულების შესახებ. აღნიშნული სახის დოკუმენტი საქართველოს შესახებ ასამბლეას არ მიუღია 2014 წლის შემდეგ. დოკუმენტში აღნიშნულია, რომ ასამბლეა მიესალმება საქართველოს უწყვეტ და ხელშესახებ პროგრესს, თუმცა დოკუმენტში ასევე აღნიშულია ის პრობლემები, რომლის მოგვარებაც საქართველოს მოუწევს პოსტმონიტორინგის დიალოგის ეტაპზე გადასასვლელად. აღნიშნულ თემაზე საქართველოს საპარლამენტო დელეგაციის წევრები, **ირაკლი ჩიქოვანი**, **თამარ ტალიაშვილმა**, **ლევან იოსელიანი**, **გივი მიქანაძე** და **ხატია დევანოიძე** სიტყვით გამოვიდნენ.

სესიაზე 2021 წლიური ანგარიში წარმოადგინა და დეპუტატთა შეკითხვებს უპასუხა ევროპის საბჭოს ადამიანის უფლებათა კომისარმა, **დუნია მიატოვიჩმა**. შეკითხვებს ასევე უპასუხა ევროპის საბჭოს გენერალურმა მდივანმა **მარია პეიჩინოვიჩ-ბურიჩმა**. ევროპის საბჭოს თავმჯდომარეობის ფარგლებში მინისტრთა კომიტეტის სახელით ასამბლეას სიტყვით მიმართა იტალიის საგარეო საქმეთა მინისტრმა, **ლუიჯი დი მაიომ**.

## **საპარლამენტო ასამბლეის მუდმივმოქმედი კომიტეტის სხდომა (31 მაისი, დუბლინი, ირლანდია)**

ევროპის საბჭოს საპარლამენტო ასამბლეაში (PACE) საქართველოს პარლამენტის მუდმივმოქმედი დელეგაციის ხელმძღვანელმა, **ირაკლი ჩიქოვანმა** ქალაქ დუბლინში მონაწილეობა მიიღო PACE-ს მუდმივმოქმედი კომიტეტის სხდომაში.

მუდმივმოქმედი კომიტეტის სესია გახსნეს ირლანდიის პარლამენტის ზედა და ქვედა პალატების თავჯდომარეებმა, **შან ფერგილმა** და **მარკ დელიმ**. მათ, თავიანთ სიტყვაში, დაგმეს რუსეთის ქმედებები, მხარდაჭერა გამოხატეს უკრაინის მიმართ და ამ კონტექსტში ყურადღება გაამახვილეს ძლიერი ევროპის საჭიროებაზე.

მუდმივმოქმედმა კომიტეტმა, მიიღო გადაწყვეტილება და დღის წესრიგში დაამატა ბიუროს მიერ შემოთავაზებული საკითხი „მეოთხე სამიტი განახლებული, გაუმჯობესებული და გაძლიერებული ევროპის საბჭოსთვის“.

მუდმივმოქმედმა კომიტეტმა ასევე განიხილა ანგარიშები და დაამტკიცა რეზოლუციები ისეთ საკითხებზე, როგორც არის ევროპაში აბორტზე ხელმისაწვდომობა, მიგრაციის პოლიტიკაში გენდერული ტენდენციების გათვალისწინება, გამოწერილ წამლებზე დამოკიდებულება, და ევროპაში ბავშვთა უკიდურესი სიღარიბის აღმოფხვრა.

სხდომის დასასრულს სიტყვით გამოვიდა და დეპუტატების კითხვებს უპასუხა ირლანდიის საგარეო და თავდაცვის მინისტრმა **საიმონ კოვენიმ**.

## **საპარლამენტო ასამბლეის სესიის მესამე ნაწილი, ზაფხულის სესია (20-24 ივნისი, სტრასბურგი, საფრანგეთი)**

20-24 ივნისს, სესიაში მონაწილეობა მიიღეს ირაკლი ჩიქოვანმა (დელეგაციის ხელმძღვანელი), გივი მიქანაძემ და ლევან იოსელიანმა.

ასამბლეის დღის წესრიგით განსაზღვრული თემებიდან აღსანიშნავი იყო დებატები, რომლებიც შეეხებოდა ევროპაში უსაფრთხოების გამოწვევებსა და ამ გამოწვევების ფონზე ევროპის საბჭოს როლს, პოლიტიკურ პარტიებში ინკლუზიურობას, ონლაინ კომუნიკაციების კონტროლს, ევროპაში ანტიემიტიზმთან ბრძოლას, ვაქცინაციის პრობლემებს. სპეციალური დებატები გაიმართა შავი ზღვის ბლოკადით გამოწვეულ შედეგებსა და დიდი ბრიტანეთის საიმეგრაციო პოლიტიკის ირგვლივ.

სესიის მიმდინარეობისას დეპუტატებს სიტყვით მიმართეს საბერძნეთის პრეზიდენტმა, **კატერინა საკელაროპულომ** და ნიდერლანდების მეფემ **ვილემ-ალექსანდერმა**. ასევე, დეპუტატების შეკითხვებს უპასუხეს ირლანდიის თავდაცვისა და საგარეო საქმეთა მინისტრმა, **საიმონ ქოვენიმ** და ევროპის საბჭოს გენერალურმა მდივანმა, **მარია პეიჩინოვიჩ-ბურიჩმა**.

აღსანიშნავია, რომ გაიმართა ორმხრივი შეხვედრები საპარლამენტო დელეგაციის ხელმძღვანელებს შორის. ვიზიტის განმავლობაში, საქართველოს საპარლამენტო დელეგაციის ხელმძღვანელმა, **ირაკლი ჩიქოვანმა** შეხვედრები გამართა უნგრეთისა და ლატვიის დელეგაციების ხელმძღვანელებთან. უნგრეთის დელეგაციის ხელმძღვანელმა, **შოლტ ნემეთმა** და ლატვიის დელეგაციის ხელმძღვანელმა, **ინეს ლიბინა-ეგნერემ** შეხვედრაზე კვლავ დაადასტურეს საქართველოს ტერიტორიული მთლიანობისა და სუვერენიტეტის უწყვეტი მხარდაჭერა და გამოხატეს თანადგომა ქვეყნის ევროინტეგრაციის პროცესში.

თავისუფალი დებატებში, ასამბლეის წევრებს სიტყვით მიმართა საქართველოს დელეგაციის ხელმძღვანელმა **ირაკლი ჩიქოვანმა** და ყურადღება გაამახვილა, საქართველოზე, როგორც რეგიონში მოწინავე რეფორმატორ ქვეყანაზე.

აღსანიშნავია, რომ 19 ივნისს, პოლიტიკურმა ჯგუფმა (SOC) ჯგუფის ბიუროს შეხვედრისას დაამტკიცა საქართველოს დელეგაციის წევრის **ლევან იოსელიანის** მოთხოვნა SOC ჯგუფში გაწევრიანების შესახებ.

**საპარლამენტო ასამბლეის სესიის მეოთხე ნაწილი, შემოდგომის სესია (27-30 სექტემბერი, სტრასბურგი, საფრანგეთი)**

დელეგაციამ, ირაკლი ჩიქოვანის ხელმძღვანელობით, მონაწილეობა მიიღო საპარლამენტო ასამბლეის დებატებში, კომიტეტების მუშაობასა და პოლიტიკური ჯგუფების შეხვედრებში. საქართველოს დელეგაციაში შედიან მუდმივმოქმედი დელეგაციის წევრები, ირაკლი კობახიძე, გივი მიქანაძე, არჩილ თალაკვაძე, ლევან იოსელიანი და ხატია დეკანოიძე.

ასამბლეის დღის წესრიგით განსაზღვრული თემებიდან აღსანიშნავი იყო დებატები, რომლებიც შეეხებოდა დასავლეთ ბალკანეთის ევროკავშირში გაერთიანების პერსპექტივას და ასევე რეზოლუციები თურქეთის, რუმინეთის და უნგრეთის მიერ ევროპის საბჭოს წევრობის ვალდებულებების შესრულების შესახებ. აღსანიშნავია, რომ უნგრეთის შესახებ რეზოლუციის დამტკიცებით, ასამბლეამ მხარი დაუჭირა მონიტორინგის პროცესის გახსნას უნგრეთის მიმართებით. ასევე ხაზგასასმელია, რომ ასამბლეამ ერთხმად დაამტკიცა ბიუროს 13 სექტემბრის რეკომენდაცია - დაემტკიცებინათ კოსოვოს დელეგაციის მონაწილეობა ასამბლეაში, ხმის მიცემის უფლების გარეშე.

შემოდგომის სესიაზე განსახილველად დაფიქსირდა სამი საკითხის განხილვის მოთხოვნა მიმდინარე საკითხების პროცედურის გამოყენებით და ორი საკითხი გადაუდებელი საკითხების პროცედურის გამოყენებით. ასამბლეამ დაამტკიცა მოთხოვნები მიმდინარე საკითხების ფორმატით სომხეთ-აზერბაიჯანის კონფლიქტის და პრაიდ ალუმების აკრძალვის განხილვის შესახებ. ასამბლეამ ასევე დაამტკიცა მოთხოვნა გადაუდებელ საკითხის ფორმატით განხილულიყო უკრაინაზე რუსეთის ფედერაციის აგრესიით გამოწვეული პოლიტიკური შედეგების შესახებ ანგარიში.

ასამბლეამ მიიღო გადაუდებელი საკითხების პროცედურით გათვალისწინებული რეზოლუციის ტექსტი რუსეთის აგრესიის შესახებ, რომელიც გმობს რუსეთის ქმედებებს, ასახავს მიმდინარე მძიმე ჰუმანიტარულ შედეგებს, მოითხოვს საერთაშორისო ტრიბუნალის და კომპენსაციის მექანიზმის შექმნას და აცხადებს რუსეთის ფედერაციის დღევანდელ რეჟიმს ტერორისტულ რეჟიმად. ასევე, რეზოლუციის პირველადი ვერსიის ტექსტში შევიდა ცვლილება და დამატდა ჩანაწერი, რომელიც ეხება მიხეილ სააკაშვილს და რომლის მიხედვითაც მისი პატიმრობა იყო პოლიტიკურად მოტივირებული. მიუხედავად იმისა, რომ ამ ცვლილებას ასამბლეამ მხარი დაუჭირა, აღსანიშნავია, რომ ცვლილების მთავარი ინიციატორი გახლდათ პოლიტიკური ჯგუფის „ევროპული სახალხო პარტიის“ (EPP/CD) ხელმძღვანელი **ალექსანდერ პოციეჟი** და მხარდაჭერის ძირითადი განმაპირობებელი ფაქტორი იყო ანგარიშზე მომხსენებლის, იგივე პოლიტიკური ჯგუფის წევრის (EPP/CD), **ემანუელის ზინგერისის** თანხმობა აღნიშნულ ცვლილებასთან დაკავშირებით. შესწორებას არ ჰქონდა ერთგვაროვანი გამოხმაურება. ამის დასტური გახლავთ, საქართველოზე მონიტორინგის კომიტეტის ერთ-ერთი მომხსენებლის, **ტიტუს კორლატანის** გადადგომა მომხსენებლის პოზიციიდან, რადგან არ იქნა გათვალისწინებული მისი მოსაზრება აღნიშნული ცვლილების საწინააღმდეგოდ. აღნიშნულ შესწორებას ქართული დელეგაციის უმრავლესობამ მხარი არ დაუჭირა.

სესიის მიმდინარეობისას დეპუტატებს სიტყვით მიმართეს და დეპუტატის შეკითხვებს უპასუხეს შვეიცარიის კონფედერაციის პრეზიდენტმა **იგნასიო კასისმა**, ირლანდიის პრეზიდენტმა **მაიკლ ჰიგინსმა**, ალბანეთის პრემიერ მინისტრმა **ედი რამამ** და უკრაინის პრეზიდენტმა **ვოლოდიმირ ზელინსკიმ**. ასევე, დეპუტატების შეკითხვებს უპასუხა ევროპის საბჭოს გენერალურმა მდივანმა **მარია პეიჩინოვიჩ-ბურიჩმა**.

## კომიტეტებისა და ქვეკომიტეტების შეხვედრები

2022 წლის განმავლობაში საქართველოს დელეგაციის წევრებმა განახორციელეს 18 გასვლითი ვიზიტი კომიტეტის სხდომის შეხვედრებზე დასასწრებად და ჯამში მონაწილეობა მიიღეს 34 კომიტეტის სხდომის მუშაობაში.

**ცხრილი:** ბიუროსა და ასამბლეის კომიტეტის სხდომები, რომლის მუშაობაშიც საქართველოს დელეგაციის წევრები იღებდნენ მონაწილეობას

თარიღი	ღონისძიება	მონაწილე
14 იანვარი, 2022	ბიუროს სხდომა	ირაკლი კობახიძე
14 იანვარი, 2022	ევროპის ადამიანის უფლებათა სასამართლოს მოსამართლეთა არჩევის კომიტეტის სხდომა	გივი მიქანაძე
21 იანვარი, 2022	ბიუროს სხდომა	ირაკლი კობახიძე
1 თებერვალი, 2022	პოლიტიკური კომიტეტის სხდომა	არჩილ თალაკვაძე
1 თებერვალი, 2022	მონიტორინგის კომიტეტის სხდომა	ირაკლი ჩიქოვანი
4 მარტი, 2022	კულტურის კომიტეტის სხდომა	თამარ ტალიაშვილი
11 მარტი, 2022	თანასწორობის კომიტეტის სხდომა	თამარ ტალიაშვილი
11 მარტი, 2022	პოლიტიკური კომიტეტის სხდომა	არჩილ თალაკვაძე
14-15 მარტი, 2022	თანასწორობის კომიტეტის სხდომა	თამარ ტალიაშვილი
14-15 მარტი, 2022	პოლიტიკური კომიტეტის სხდომა	ირაკლი ჩიქოვანი
16 მარტი, 2022	პოლიტიკური კომიტეტის სხდომა	არჩილ თალაკვაძე
17 მარტი, 2022	სოციალური კომიტეტის სხდომა	მარიამ ლაშხი
21 მარტი, 2022	მიგრაციის კომიტეტის სხდომა	აკაკი მინაშვილი
29 მარტი, 2022	მონიტორინგის კომიტეტის სხდომა	ირაკლი ჩიქოვანი (პარიზი), ხატია დეკანოიძე (დისტანციურად)
30 მარტი, 2022	მონიტორინგის კომიტეტის კონფლიქტთა ქვეკომიტეტის სხდომა	ირაკლი ჩიქოვანი
4 აპრილი, 2022	იურიდიულ საკითხთა კომიტეტის სხდომა	გივი მიქანაძე
7-8 აპრილი, 2022	ბავშვთა საკითხების ქვეკომიტეტი	მარიამ ლაშხი
21 აპრილი, 2022	კულტურის კომიტეტის სხდომა	თამარ ტალიაშვილი
21 აპრილი, 2022	პოლიტიკური კომიტეტის სხდომა	არჩილ თალაკვაძე
29 აპრილი, 2022	იურიდიულ საკითხთა კომიტეტის სხდომა	გივი მიქანაძე
9-10 მაისი, 2022	კულტურის კომიტეტის სხდომა	თამარ ტალიაშვილი
16 მაისი, 2022	სოციალური კომიტეტის სხდომა	ლევან იოსელიანი
23 მაისი, 2022	იურიდიულ საკითხთა კომიტეტის სხდომა	გივი მიქანაძე
24-25 მაისი, 2022	მონიტორინგის კომიტეტის სხდომა	ირაკლი ჩიქოვანი
9 ივნისი, 2022	ევროპის პრიზი - ქვეკომიტეტი	მარიამ ლაშხი
5-6 სექტემბერი, 2022	იურიდიულ საკითხთა კომიტეტის სხდომა	გივი მიქანაძე
12-13 სექტემბერი, 2022	პოლიტიკური კომიტეტის სხდომა	არჩილ თალაკვაძე
14-15 სექტემბერი, 2022	მონიტორინგის კომიტეტის სხდომა	ირაკლი ჩიქოვანი

29-30 სექტემბერი, 2022	ევროპის ადამიანის უფლებათა სასამართლოს მოსამართლეთა არჩევის კომიტეტის სხდომა	გივი მიქანაძე
14 ნოემბერი, 2022	იურიდიულ საკითხთა კომიტეტის სხდომა	გივი მიქანაძე
12 დეკემბერი, 2022	იურიდიულ საკითხთა კომიტეტის სხდომა	გივი მიქანაძე
13 დეკემბერი, 2022	პოლიტიკური კომიტეტის სხდომა	ირაკლი ჩიქოვანი
14-15 დეკემბერი, 2022	მონიტორინგის კომიტეტის სხდომა	ირაკლი ჩიქოვანი
15 დეკემბერი, 2022	დემოკრატიული არჩევნების საბჭო	გივი მიქანაძე